

寶慶四明志

四明志卷第八

郡志卷第八

叙人上

明山之東三垂際海清淑之氣於是乎窮  
毓奇孕秀顯諸人者宜也然衣冠文物至  
我朝而始盛氣之所鍾亦有待而發歟

先賢事迹上

古鄞鄭向章縣隋唐以來皆更易且有初居外邑繼

善府城者故不家分縣

志于此隨世次先後子孫

繫其父祖非有所重輕也

夏黃公鄞人避暴秦匿山中漢高帝求之不得

帝嬖戚夫人欲廢太子立夫人子趙王如意  
大臣以死爭不聽太子用張良言以禮迎公  
公與園公綺里季角里先生偕至帝寢太子  
侍四人從年皆八十餘須眉皓白衣冠甚偉  
上恠問何爲者四人前對各言姓名上迺驚  
曰吾求公避逃我今何自從吾兒游四人曰  
陛下輕士善罵臣等義不辱今聞太子仁孝  
恭敬愛士莫不延頸願爲太子死者故來上  
曰煩公幸卒調護太子四人爲壽已趨去上  
目送之召戚夫人指視曰我欲易之彼四人

爲之輔羽翼已成難動矣呂氏真乃主矣戚  
夫人泣涕上曰爲我楚舞吾爲若楚歌歌曰  
鴻鵠高飛一舉千里羽翼已就橫絕四海橫  
絕四海又可柰何雖有矰繳尚安所施戚夫  
人歔歔流涕上起去罷酒竟不易太子者此

四人力也後太子立是爲惠帝

史記留侯世家注陳留志

云公姓崔名廣字少通齊人隱居夏里故號黃公三國志虞翻傳曰鄆大里人

張齊芳驃騎將軍意之子隱於慈溪之驃騎山

人皆賢之遂以其父之官名其山

出慈溪舊志

董黯字叔達仲舒六世孫也事母孝母疾嗜旬

章溪水遠不能常致黯遂築室溪濱板輿就  
養厥疾乃痊比鄰王寄之母以風寄寄忌之  
伺黯出辱其母黯恨入骨母死慟采切枕戈  
不言一日斬寄首以祭母自白于官奏聞和  
帝詔釋其罪且旌異行召拜郎官不就由是  
以慈名溪以董孝名鄉吳虞翻稱之云盡心  
色養喪致其哀單身林野鳥獸歸懷怨親之  
辱白日報讎海內聞名昭然光著今子城東  
南有廟舊志謂即其故居則黯本鄆人也虞  
翻謂爲句章人據其徙居慈溪言之

任光字景昇鄧人爲縣主簿時海賊作孽令朱  
嘉將吏人出戰爲賊所射傷賊突嘉前光以  
身障蔽力戰死嘉獲免還邑出俸厚葬之出會

稽典錄

鄭雲梁宏皆句章人俱爲主簿篤終始之義州  
里稱之一云雲字仲興學韓詩公羊春秋爲  
主簿後以劉雋事獄死郡以狀聞旌表門閭

出會稽典錄

任奕句章人爲御史中丞朱育稱其爲文章之

士立言粲盛今有任子十卷見意林出會稽典錄及

王阮所脩  
昌國志

王脩句章人仕順帝時爲揚州從事軍變殺歷  
陽太守伊曜脩誓衆奔入賊營取曜屍葬之

人服其義

出會稽  
典錄

闕澤字德潤好學居貧無資常爲人傭書以供  
紙筆所寫旣畢誦讀亦遍察孝廉除錢唐長  
遷柳令孫權爲驃騎將軍辟補西曹掾及稱  
尊號以爲尚書嘉禾中爲中書令五年拜太  
子太傅領中書如故澤以經傳文多難得盡  
用乃斟酌諸家刊約禮文及諸注說爲制行

出入及見賓儀又著乾象歷注以正時日每  
朝廷大議經典所疑輒咨訪之以儒學勤勞  
封都鄉侯諸官司欲增重科防以檢御臣下  
澤每曰宜依禮律其和而有正皆此類虞翻  
稱之曰闕生矯傑蓋蜀之楊雄又曰闕子儒  
術德行亦今之仲舒也六年冬卒權痛惜感  
悼食不進者數日三國志本傳指為會稽山  
陰人按今慈溪縣之普濟寺乃澤舊居峯曰  
闕峯湖曰德潤湖山水猶識其姓字則澤為  
句章人可知



晉虞喜字仲寧少立操行博學好古郡察孝廉  
州舉秀才司徒辟公車徵拜博士皆不就太  
寧中又以博士徵復下詔徵辭疾咸和末詔  
公卿舉賢良方正直言之士太常華恒舉喜  
會國有軍事咸康初內史何充上疏曰臣聞  
二八舉而四門穆十亂用而天下安伏見前  
賢良虞喜天挺貞素高尚邈世束脩立德皓  
首不倦旁綜廣探博聞強識宜使蒲輪紆衡  
以旌殊操詔曰潯陽翟湯會稽虞喜守道躑  
學操擬古人往雖徵命而不降屈政道須賢

宜納諸廊廟其並以散騎常侍徵又不起有  
司議祧廟不能決朝廷遣使就諮訪焉晉書  
本傳曰會稽餘姚人然喜所居乃句章之南  
山世目其山曰大隱見夏侯曾先地志今屬  
慈溪諸虞墓亦多在慈溪是時慈溪地乃句  
章縣亦隸會稽郡而與餘姚接境故史槩曰  
會稽餘姚云

張無擇句章人性篤孝父仕唐任袁州司馬卒  
於神龍初歸葬縣之虎胛山無擇負土營葬  
結廬於墓七日絕漿三年不櫛醴泉出芝草

生其後官至中散大夫終和州刺史至今廟

食慈溪

出舊志

賀知章字季真性曠夷善譚說與族姑子陸象  
先善象先嘗謂人曰一日不見季真則鄙吝  
生矣唐證聖初擢進士超拔羣類科累遷太  
常博士開元十三年遷禮部侍郎兼集賢院  
學士尋遷太子右庶子充侍讀申王薨詔選  
挽郎蔭子訥知章取舍不平徙工部肅宗爲  
太子遷賓客授秘書監晚節尤誕放遨嬉里  
巷自號四明狂客及秘書外監每醉輒屬辭

筆不停書咸有可觀善草隸好事者具筆硯  
從之意有所愜不復拒纔十數字世傳以爲  
寶天寶初夢游帝居數日寤乃請爲道士還  
鄉里詔許之以宅爲千秋觀而居又求周宮  
湖數頃爲放生池有詔賜鏡湖剡川一曲旣  
行帝賜詩皇太子百官餞送擢其子曾子爲  
會稽郡司馬賜緋魚使侍養幼子亦聽爲道  
士卒年八十六肅宗乾元初以雅舊贈禮部  
尚書唐書本傳所載如此然今鄞縣句章鄉  
小溪之馬湖有洗馬池故跡世傳以爲賀監

小  
君六八  
舊宅相距三里曰賀家灣其地賀姓甚多而  
貧掘土得碑石率棄之今其斷石存而可識  
者曰會稽郡賀與府君六字而已耆老謂賀  
監始居此後乃徙剡川也

徐浩自稱四明山人唐乾元二年進廣孝經十  
卷授校書郎又有書譜一卷古跡記一卷

出藝

文志

孫郃奉化人四明才名記云孫郃博學高才唐  
末授左拾遺淨惠院即其故宅載於舊志唐  
文粹有古意效陳拾遺有哭玄英方干先生

詩有卜世論春秋無賢臣論皆邵之作也其  
遠孫曰沔字元規

皇朝天禧三年中進士第爲人明敏果敢有  
材歷官至監察御史裏行 景祐元年

莊獻太后服未除而禮官請用冬至日冊后  
沔奏請俟祥禫上封者李安世方下吏沔又  
言始天子躬親政事而孔道輔范仲淹皆以  
言事謫去今在位無敢言者天下不知安世  
狂誕又謂以言得罪竊爲陛下惜之數日出  
知潭州衡山縣沔旣行自惟忠憤未盡申復

上書曰天下之勢常患久安而不知其壞也  
比歲以來水旱薦至歲饑民愁陛下得恃以  
爲安乎去秋以聖躬弗豫雙日既不御殿又  
無漢唐非時延對之事臣竊計之一歲之中  
加之給休是率廢三分日之一也欲萬務之  
舉其何由哉今深宮之中左右皆用事官人  
私謁浸盛內寵並興恐非所以隆德業養壽  
命之原也於是又貶永州監酒其後歷知處  
州楚州召爲左正言時元昊叛有請以五路  
進兵者沔以爲天下承平日久人不知戰今

不思內修備以待之乃欲盡毆精兵深入狂  
虜之境虜即據前險守後阨使我師不得還  
則關中之勢不得不危此可爲全計乎其後  
屢以言忤大臣出提點兩浙刑獄及陝西兵  
不利天子思汚言以爲陝西轉運使就除環  
慶路經略安撫使知慶州徙渭州復徙慶州  
徙陝州改河東都轉運使復知慶州元昊死  
子且幼國人未和諸將欲因而伐之汚獨奏  
曰中國以信義示夷狄柰何伐人之喪也於  
是詔有司趣行封冊之禮明年除知益州道



中罹母憂頌之特起知永興軍不行沔先世

徙寓會稽至是服闕除陝西都轉運使沔未

欲遠去墳墓乞知明州許之杜正獻公衍遺

之詩云四明山水饒靈粹唐有希韓夔出倫

又見賢侯光乃祖

杜公自注君侯遠祖諱郃

暫還仁里庇

斯民時 皇祐三年也屬山東盜起徙知徐

州至則捕羣盜盡誅之四年廣源蠻舉兵陷

邕州進攻廣州公適徙秦州入見語及南事

仁宗曰二府以南事不足憂也沔曰賊技與

中國殊而去巢穴遠鬪其勢未易當又盛夏

瘴熱官軍往必不利豈得不憂也沔行明日  
蔣偕軍以敗聞即召沔還為湖南江西路安  
撫使得以便宜從事尋徙為廣南東西路安  
撫使仍以樞密副使狄青為宣撫使寇平沔  
還遷給事中

仁宗解所御寶帶賜之請知杭州行至南京  
召為樞密副使其年契丹使來請觀太廟樂  
沔建議折之曰廟樂皆歌詠

祖 宗功德能留與吾祭乃可觀使者乃已  
張貴妃薨治喪皇儀殿葬曰山陵謚曰恭德

沔極陳不可遂罷山陵改謚溫成既而命讀  
謚冊沔曰此冊臣沔讀則可樞密副使讀則  
不可爲同列者所忌請罷除知杭州尋知青  
州并州沔在杭日治姦僧猾民不少貸怨謗  
紛起至是以御史彈奏責寧國軍節度副使  
復光祿卿分司南京尋知濠州請老以禮部  
侍郎致仕築居于明有詩曰新治甬上居閑  
逸安暮齒

英宗皇帝即位遷戶部 治平二年羗人數  
出寇 詔沔知河中府既入覲改知慶州慶

人相賀曰昔我公來前後五年羗人未嘗敢  
犯吾境今邊事適起不意老幼之復見公也  
居數月境內大安明年徙延州道病薨謚威  
敏年七十一

以續通鑑及王岐公所撰墓誌  
及樓宣獻公所跋杜正獻公詩

修參

楊適字韓道慈溪人明律歷曉兵法隱居大隱  
山以文學行義聞于鄉里人皆不敢道其姓  
名以先生目之

仁宗皇帝訪天下遺逸知州事鮑軻以名聞  
賜粟帛嘉祐六年知州事錢公輔又表奏

適高節授將仕郎試太學助教州遣從事躬  
捧 詔書具袍笏與從以禮起之辭不受年  
七十餘沒葬大隱山縣令林叔豹爲立碑祠

于學

出舊志

杜醇慈溪人經明行脩不求聞達 慶曆中縣  
令林肇一新鄉校請公爲之師不可王文公  
安石再爲林作師說以勉之至今與楊公適  
並祠于縣學

樓郁字子文志操高厲學以窮理爲先 慶曆  
中詔郡國立學其不置教授負者聽州里推

擇公首應選郡人翕然師尊之俞公充豐公  
稷表公穀舒公曾皆執經焉荆國公王安石  
宰鄞以書致之曰足下學行篤美信於七友  
其所仰歎登皇祐五年進士第調廬江主  
簿丁母憂自嘆祿不及親絕仕進意以大理  
評事終于家有遺集三十卷子常光孫昇弁  
五世孫鏐鉉鑰鑄鑛六世孫汶淮澈七世孫  
采皆取世科昇字試可常子也政和七年  
守鄞郡廢廣德湖為田造舟艦供三韓使甚  
稱

上意令因任睦寇猖獗備禦有方人皆德之  
積官至朝議大夫贈太師封楚國公鑰字大  
防異孫也少警敏書一再讀能記誦詞章雅  
贍 隆興初元擢進士第明年又中教官選  
後用大臣薦入 朝稍遷太常博士時搢紳  
間好惡各異鑰歷陳後漢黨錮唐朋黨元符  
黨籍之弊謂事之初生若不足較橫流不止  
害不可言

孝宗曰卿懼爲黨耶唐世人主謂去河北賊  
易去朝廷朋黨難朕嘗笑之特主聽不聰爾

光宗嗣位鑰以知温州滿奏事留中歷考功  
郎立左螭登西掖禁中或私請

上曰樓舍人朕亦憚之不如且已

寧宗新御極內外制鑰獨當之遷給事中以  
平日素論正

太祖東向之位知閤門事韓侂胄弄權有萌  
芽吏部侍郎彭龜年除職與郡鑰與林大中  
合詞論奏龜年舊學也侂直敢論事其可去  
乎乞留之經筵命侂胄以外祠 上批龜年  
已是優異侂胄初無過尤鑰再奏若以爲優



異則侂冑之轉承宣使非優異乎若謂初無過尤則龜年乃出於愛君之誠心不顧身以進忠言豈爲過乎但直臣去國自此恐無敢爲 陛下出力論事者侂冑啣之三日遷天官實奪封駁之權也趙忠定公汝愚被誣去國臺諫昌言定鼎乘龍之夢鑰曰趙公嘗夢孝宗召對取御爐金湯瓶授之曰朕之用卿如此謂之定鼎可乎又嘗夢立班見白龍升天居無何 上以袞服登寶位謂之乘龍可乎如臺諫所言是欲覆人家族爾鑰親聞於

趙不可誣也聞者汗下鑰遂決去居閑十有  
三載褫職者再甘心焉侂胄欲籠絡之風使  
自通鑰不爲動 更化初以翰林學士召遷  
吏部尚書遂簽書同知樞密院事參知政事  
以年乞身薨謚宣獻其平日游息之地曰攻  
媿齋故自號攻媿主人有文集一百二十卷  
鑰之兄曰錫字子善以材敏稱父任補官初  
調秀州戶掾會鎮江有軍校訴于 朝自言  
父掌軍用列校貸錢以萬計知其將訴欲殺  
以滅口脫身而來追者躡後出此門則死矣

廟堂駭之奏得旨勅漕臣擇郡縣吏鞠之許以棘寺推獄行時二漕使胡昉呂正己合詞以錫應選錫請械軍校以隨途中時與語錫得其情至則索證左軍校具服誣狀三日而竣事棘寺吏跽請曰事體甚重今遽已後當悔錫曰我不知觀望惟盡其情而已既還白廟堂疑其速驗軍校無遁辭奏聞

孝宗嘉嘆良久除監左藏庫都門遷勅令所  
刪定官

上記平鎮江獄事遷太府丞改丞大理吏曰

是爲初官能決詔獄者不可欺也連治數大  
獄皆平允以便親乞補外知嚴州丁父憂毀  
卒鑰之長子濶字質夫仕至屯田郎中死之  
日囊無餘金文行皆能世其家樓氏世居奉  
化繼徙于鄞有義莊以贍族一倣范文正公  
之成規昇之子璿字壽王所創也據碑記及樓氏家傳  
王說字應求鄞人以其學教授鄉里餘三十年  
熙寧九年以特恩補將仕郎爲州長史無田  
以食無桑麻以衣怡然自得沒門人舒亶銘  
之先是有王致亦州間所師至今郡庠以與

揚公適杜公醇樓公郁並祠謂之五先生云  
說之第該字蘊之登 慶曆六年進士第王  
安石宰鄞時與之友善以詩章相唱酬與兄  
齊聲仕不偶官舍傍有嘉木葉長可尺許每  
得一詩取葉書之既沒歸橐蕭然惟脫葉甚  
富遺藁十卷長子瓘字元圭登 元豐五年  
進士第喜藏書以文稱珩字彥楚說第五子  
也十九歲入太學 大觀三年登進士第仕  
至宗正少卿年八十卒有考經傳異同論三  
卷臆說五卷時政更張議四卷字學撫要二

卷雜言三卷和杜詩一百七十一篇勲字上  
達說之孫也太學上舍生登政和八年  
進士第

高宗東廵命爲勲宰徒提舉廣南市舶以廉  
稱終朝散郎正己字正之勲長子也勲與妻  
薛氏俱沒官所羣胡念其清苦哀金錢二百  
萬爲贖正己不受以叔祖珩任爲甌城主簿  
連帥張澄俾對易理曹時相姻黨王鈇家豫  
章冢舍亡瑞香花與一富民有他憾因誣之  
帥諷理曹文致其罪正己直之忤帥意稱疾

尋醫以歸

孝宗聞之既踐祚詔以不畏彊禦節旣可嘉  
自泰州海陵縣召對改合入官 淳熙初訪  
求廉吏參政葉衡舉正已辭賻事以聞召對  
上語輔臣曰王正已望之儼然即之甚溫史  
忠定王浩再相論朋黨事

上曰葉衡旣去人以王正已爲其黨朕固留  
之雖衡所引其人自賢則知朕不以朋黨待  
臣下也正已九四典郡六爲部使者終太府  
卿祕閣修撰致仕年七十八卒

高宗山陵竣事嘗進 聖德孝感記 上曰

卿文似韓愈已宣付史館有文集二十卷

嘉定初被 旨繳納國史院正功字承父以  
父任補官終朝請大夫廣西提刑正民字經  
父以叔祖遺澤補官終奉直大夫知安慶府  
皆正已第俱有廉名

周師厚 鄞人 皇祐五年登進士第歷荆湖北

路農田水利差役事時 朝廷方議役書本

路紛更未定且有欲爲撈甲法者師厚具論

四方風俗盜賊婚田獄訟簿書繁簡之所以



不同則役有勞逸輕重宜亦不可以一朝

廷以爲是下其說行之辰沅兩州初復版圖

縣官念所以備邊且欲歲發常平粟師厚謂

溪獠嘯聚無常而常平之入有限不可繼宜

乘事始擇曠土使戍卒且耕且守亦古法也

天子然其策子鐸字兼彥中元豐二年乙

科調桐城尉旣而曰古者學而後入仕未聞

以政學也曩時口耳剽習特以取科目爾士

當以治心修身爲本本立則事不足治於是

官期至不赴經史百家之書無不讀讀必究

其指歸著而爲言必期有用旁至兵刑小學  
天文地理博極淹該時潞公文彥博韓公富  
弼溫公司馬光與其舅氏蜀公范鎮皆聚洛  
下鏐每造詣講貫上書論邊事歷陳永樂覆  
敗之由

神宗嘉之籍姓名于中書國子祭酒豐稷給  
事中范祖禹以學官賢良薦歷官自濠州戶  
曹以至提點江淮荆浙福建等路坑冶鑄錢  
公事爲政皆有綱要居漕幕則著會計錄振  
領圖宰縣則著日成月要歲會集守郡則著

承宣集閱其書可以知其政矣黨議興名在籍中又以言邊事忤時宰所嚮浩然有歸志第銖中 崇寧二年進士第仕未老亦退休相與徜徉山水間唱酬成編 紹興初朝廷牽復黨人特轉中大夫將用之而老矣有奏議表啓雜文二十卷明天集一卷六甲奇書一卷尚書汪大猷差次之別承宣集爲二卷製序以冠其首尊之曰鄞江先生文集

陳輔字安國五世祖自福州徙居象山父大雅工詩好爲義事輔七歲誦書百卷家貧力學

夜不寢置足水中以警寐登 嘉祐二年進

士第知武康縣教民以大竹絡石築海塘始  
免水患知安吉縣救饑活流民以千計將代  
邑民詣郡及使者借留使者才之命攝華亭  
俾求前令張若濟罪輔不願使者怒徙攝壽  
昌守請于使者復還安吉後倅揚州穿渠龜  
山南徑洪澤以避淮波民便之管勾成都轉  
運司文字知邛州丞相呂公大防范公純仁

欲用之會以疾卒

見晁無咎  
所撰行狀

俞充字公達鄞人登

嘉祐四年進士第

熙

寧三年五月以著作郎編修中書條例累遷  
都檢正集賢殿修撰都提舉市易司及在京  
諸司庫務宰臣王珪知 上欲伐夏國 元

豐元年八月奏充爲右正言天章閣待制知  
慶州環慶路經略安撫使環州有田與夏國  
相錯委而荒之充檄所部以時耕種 不敢  
犯屬羗山夷嘯聚背叛充授第二將張守約  
以籌筭且招且討有云入夏國者三百戶充  
又遣守約耀兵塞上夏人亟歸亡者條上勸  
賞買馬之法騎馬頓增慶兵素玩恩充繩以

法軍始肅然屢上取靈武之章四年六月暴

卒高遵裕代之西師乃困充有奏議五卷邊

說二卷藏于家

以舊志所載及續通鑑參修

偉字仲寬充

之叔父也

元祐初爲南劍州之順昌令邑

民生子多不舉偉乃集耆老諭之以理且申

約束曰孕者登籍邑人悔悟率以偉字名其

子部使者聞于

朝降

詔獎諭進秩再任且許出粟以賑其

孱卧而貧者偉益憫惻宣諭

朝廷好生之

意數年間賴以活者萬餘人邑士廖曉爲德

政碑黃裳作邑中步雲閣亦紀其政績以循

吏許之

見舊志

豐稷字相之鄆人弱冠登嘉祐四年進士第

歷襄州穀城令韓維曾鞏相繼守襄竒之薦

於朝是時兵部侍郎葉康為光化令亦有

名維嘗曰豐葉二令它日必皆清近襄陽人

歌之曰葉光化豐穀城清如水平如衡元

豐元年安燾使高麗辟為書狀官還循兩資

三年自封丘縣除監察御史裏行王安禮除

翰林學士上數稱之稷言安禮性行淫僻

師言鄙之擢在詞禁將何以訓多士儀四方  
乞寢成命其彈劾不避權要類如此五年除  
吏部員外郎時安禮爲尚書右丞稷乞避安  
禮從之 元祐二年自成都府路提刑召爲  
工部員外郎以胡宗愈王覲薦除殿中侍御  
史尋遷左司諫三年親王有令成都府路走  
馬承受官造錦地衣者稷白御史中丞胡宗  
愈請率僚屬言之宗愈未決稷即獨奏劾謂  
二聖以節儉化天下而近屬奢侈僭靡如此  
官吏輒承奉宜皆糾正其罪監察御史趙屺



時與稷同進對退謂稷曰聞君言使屺汗流  
浹背給事中趙君錫曰諫官如是天下必太  
平矣不數日稷徙國子司業歷起居舍人中  
書舍人太常少卿國子祭酒兼侍講刑部侍  
郎以集賢院學士知潁州移廣州過關留  
拜吏部侍郎丐出累典大藩

徽宗皇帝即位韓忠彥言豐稷可作諫議

元符三年四月拜左諫議大夫隨遷御史中  
丞七月與殿中侍御史陳師錫同奏章博當  
國七年竊持威柄禍福天下勇於害賢敢於

殺人臨大變訂大事包藏陰謀發爲異議祖  
宗付陛下震之上帝命陛下誅之九月又連  
疏言翰林學士承旨蔡京資政殿學士知江  
寧府蔡卞兄弟同惡迷國誤朝卞雖去位尚  
竊峻職玷名邦京偃然在職日夜交結內侍  
戚里以冀大用京好大喜功銳於改作若果  
大用天下治亂自此分矣祖宗基業自此隳  
矣陛下去卞不早旣去又不能正典刑以明  
罪惡京以此窺陛下故敢愚弄朝廷玩侮國  
章臣恐天下有識之人豪傑之士皆解體矣

既而稷登對極論鄧洵武向宗良爲京幽黨  
陰爲游揚進列要路大爲國害又上疏論近  
習懷唐書上殿爲

上讀仇士良傳方讀數行上曰已諭稷爲不  
聞者讀畢乃止十月曾布將拜相稷謂臺屬  
布以內侍進交通詭祕盍共論之章未上徙  
工部尚書尋兼侍讀建中靖國元年正月  
權禮部尚書崇寧元年五月追貶司馬光  
呂公著等曾布言豐稷助元祐之人詆毀先  
政可見朋比出知越州改明州九月責授道

州別駕台州安置其後叙復提舉亳州太清

官以薨謚清敏

舊志所載其略今據續通鑑添入

袁穀字容直一字公濟舉進士一試于開封兩

試于鄉皆第一 嘉祐六年中第博貫羣書

擅名詞藻歷知邵武軍通判杭州其爲開封

舉首也蘇文忠公軾實爲之亞及貳郡而軾

爲守相得益驩唱酬篇什甚富移知處州終

朝奉大夫贈光祿大夫有文集七十卷纂通

題一百卷子灼曾孫章玄孫燮洽六代孫肅

甫商七代孫衡世科相踵甫 嘉定甲戌廷

對爲進士第一灼字子烈仕於朝爲光祿

寺丞軍器少監出知婺州有武臣曹宗者時

相蔡京之戚黨也武斷鄉曲灼械之獄死焉

坐是貶秩起知隨州宣和末召爲倉部郎

面對力勸上清心省事安不忘危言甚切

直黜知泗州終朝議大夫燮字和叔少游太

學以舍選中淳熙八年進士第調江陰尉

召赴都堂審察不就慶元初擢太學正時

論擊道學之黨一斤十餘年尋改秩通判贛

州嘉定更化召爲宗正簿樞密院編修官

太常丞兼權考功郎出知江州提舉江西常  
平茶鹽入爲都官員外郎歷學館兼國史實  
錄院陞禮部侍郎兼侍讀其在太學日延諸  
生訓以語孟大旨在經筵從班每竭誠意廣  
忠益

寧宗皇帝常嘉納之修 高宗寶訓既進讀

有 旨復專修 孝宗寶訓垂成而去 國

差知温州力辭以煥章閣學士致仕遺奏

聞贈龍圖閣學士光祿大夫

舒亶字信道慈溪人生而魁梧博聞彊記爲文

不立藁登 治平二年進士第授台州臨海  
縣尉縣負山瀕海其民慄悍盜奪成俗有使  
酒逐其叔之妻者至置前命執之不服即斷  
其首以令投檄而去留詩云一鋒不斷姦兇  
首千古焉知將相材丞相王安石聞而異之  
欲召用會丁父憂服闋乃除審官西院主簿  
從秦鳳等路提點刑獄鄭民憲相度熙河營  
田民憲言其宣力最多乞以減年磨勘回授  
之特改奉禮郎提舉兩浙常平 熙寧八年  
十一月入爲太子中允權監察御史重行

元豐二年七月論知湖州蘇軾上謝表譏切  
時事并上其印詩三卷時御史中丞李定御  
史何正臣亦攻軾詔罷軾任逮赴御史獄十  
二月獄成軾責授檢校水部員外郎黃州團  
練使本州安置亶又言張方平司馬光范鎮  
錢藻陳襄曾鞏孫覺李常劉放劉摯等收受  
軾譏諷 朝廷文字各罰銅二十斤亶爲縣  
尉坐廢時張商英爲御史言其材可用得改  
官及亶知諫院商英爲中書檢正以其增王  
瀉之所業屬亶亶併其手簡繳進自以職在



言路不受干請也四年自侍御史知雜事除  
知制誥兼判國子監累遷試給事中直學士  
院御史中丞六年以論奏尚書省錄目事坐  
廢 紹聖元年三月復通直郎管勾洞霄宮  
崇寧元年正月起知南康軍時方開邊蠻寇  
擾辰七月除置直龍圖閣知荆南府荆湖北  
路都鈐轄辰州故黔中郡歷漢唐皆建郡縣  
至五代始棄不通然亦有內屬者 熙寧元  
豐開復沅誠而 元祐中又棄之自是徭人  
恃險難制置圖上地形募施黔土人分七路

遣將授以方略斬賊首併其徒黨三千餘級  
俘數百人破洞百餘遂分叙浦辰溪龍潭爲  
七以忠順首領主之旣奏功 朝廷又詔賈  
興復誠州乃進屯沅州兵未壓境而渠陽五  
溪降胡耳西道最爲僻遠至是亦請命

天子爲之告廟肆赦改誠州爲靖州賈復計  
議築屯沅之洪江分兵江之南建若水豐山  
貫堡三寨靖州跨大江在飛山之東徭人出  
入多以爲障蔽賈乃選形勝得飛山福純坡  
建新城最爲控扼之要二年 朝廷遣使撫

問除龍圖閣待制卒于軍年六十三贈龍圖

閣學士有手編元豐聖訓三卷文集百卷

出續通鑑書志載自熙河分畫蕃漢疆界  
遷授太子中允御史裏行與續通鑑不合

姚孳字舜徒慈溪人登熙寧九年進士第歷

尉掾爲鼎之桃源宰施澤於民深郡將武人

怙威凌其屬孳不爲屈苟利於民必求直乃

已旁郡訴訟不得其平率丐于部使者付孳

決之興修庠序士勸于學鄉有號禱于社諭

以文越三日虎仆于社旁奏課爲天下第一

部使者舉學行優異材能顯著以應元符

之詔 賜對稱 旨除提舉成都府路常平等事陞辭

上以父任桃源有愛民之心獎之孳退謁丞相論蜀利疚乞以義倉之儲收養鰥寡老疾死給衣衾歛瘞貧困有子不舉官給乳媪丞相奏行丁家艱服闕提舉湖南常平等事

上諭之曰朕施實德于民立居養院安濟坊漏澤園卿向有言故復命卿易使浙部徙江東轉運副使除直龍圖閣知夔州興學校劭農桑有古循吏風卒于官夔民罷市聚哭訃

聞桃源民傾貲命緇黃即生祠爲祈福焉

見舊

志

公羽升字南仲慈溪人力學有志氣少從安定胡先生受易旨入太學中元豐五年進士第出仕恪守官箴濟以廉謹當路才之上書言事切中時病用事者方主黨禁錮賢士大夫籍升名于初等自是沉於選調建炎初黨禁解將召用之而山林之志已不可奪矣升自奉簡薄而勇於急人睦親卹孤平糶振乏鄉人敬之至今猶諱升斗之字曰方

斗云

見監察御史顧文所撰墓志

俞夔象山人魁岸脩偉晝漁而夜讀書登元

豐五年進士第舒公賈平辰沅寇奏夔等晝  
為莫府第一終建德宰子觀能字大任 紹  
興初應 詔詣 闕上書特授德安府錄參  
登十二年進士第時

二聖尚狩沙漠

九重旰食觀能哀古今君臣孝弟數十事曰  
孝弟類鑒上之有 旨召審察授江陰軍教  
授改秩而卒子茂系字唐英登 乾道二年

進士第臨政以平允稱終和州通判

見陳禾何涇樓

錄所撰墓志行狀

蔣猷字仲遠丹陽人中元豐八年進士第

徽宗朝為御史中丞兼侍讀論今羣臣無他能惟善候司人主意承望大臣為嚮背者謂之才此風不可長又言近侍祠禁中見路寢尚仍舊瓦木塗墍皆故暗願推廣聖心每如此以保盈成先是內侍省乞不隸六察猷駁正之尋按劉友端等皆降官范之才奉使淮南還言滁水有鼎發民賦水鑿山以出之

猷劾其妄授之才千里外又言東南應奉花  
石器用之物願一切罷之廣東轉運使徐惕  
以虛名羨財進奉後苑請重寘之法上不  
從乞罷遷兵部尚書改工部陞吏部以言者  
罷宣和四年自祠宮起知明州以不樂應  
奉事到官數日復丐祠七年以刑部尚書召  
兼資善堂翊善虜騎至京師欽宗受內  
禪上皇東巡童貫總兵扈從上貶貫環  
衛竄池州恐忤上皇意猷持詔往泣告  
上皇乃宣詔童貫趨貶所上皇還京師遷



兵部尚書 靖康元年奉祠 建炎三年避  
地于明明年薨贈特進顯謨閣直學士葬于  
鄞其後遂爲鄞人

陳禾字秀實鄞人 元祐初試國子監擢第一  
居太學有聲中 元符三年進士甲科初調  
鄞州司法平反甚多部使者列薦于 朝除  
濰州州學教授講明經術大變其俗後由婺  
州教授入爲太學正遷辟雍博士

徽宗聞其才召對稱 旨特與改秩擢監察  
御史遷殿院隨事獻言 上愈嘉其忠直命

爲左正言童貫始侵預朝政禾曰此國家安危之本抗疏力陳漢唐之禍不可不戒惟陛下留意於未然論列既久日晚上拂衣而起曰朕飢矣禾褰挽上衣泣奏曰願陛下少留容臣罄竭愚衷上爲少留禾曰此曹今日受富貴之利陛下他日受危亡之禍孰爲輕重願陛下擇之上衣裾脫落曰正言碎朕衣矣禾奏曰陛下不惜碎衣臣豈惜碎首以報陛下其言激切上爲之變色且曰卿能如此朕復何憂內侍請上易衣上

止之曰留以旌直節繼而貫等諧行遂罹廢  
斥後坐與忠肅公陳瓘交游流落江湖著書  
立言以垂世有論語孟子易春秋四經解行  
于世其文集藏于家禾父謚字康公博學教  
子有法 嘉祐八年登第子曦 紹興八年  
又登第兄秉以八行舉 政和八年登第世  
喜藏書謚之亡舒中丞亶作挽章有曰塵埃  
滿匣空鳴劍風雨歸舟只載書曦復為藏書  
記以告其後俾勿墜素業

孝宗朝史忠定王浩以禾四經解進 玉音

嘉嘆攷之祕館特官其孫正己

寧宗更化之初崇獎忠節風厲四方孫鎮江府通判立已有請于朝特贈中大夫賜謚

文介

張宏字公度鄞人元祐二年舉經明行修仕至禮部郎中歷守建昌軍泰州澤州嘗築慈溪縣藍溪洪莊保之堰埭民至今賴之宏六世祖次宗唐會昌中爲明州刺史四世祖仁皓爲兵馬鈐轄使廟食於奉化茅山曰武惠四太王者是也

劉渭象山保德村人家業農奮志為學鄰里  
之不顧也登元祐六年進士第授荆門軍  
長林令歷官至西京留臺其讀書堂遺蹤尚  
存父老傳以為美談遵字繼道渭之族也博  
學強記尤精於經術受業者不遠千里多所  
成就紹興甲子己卯兼經取士父子皆以  
詩舉該特恩授文學子侯字碩翁總角日誦  
千言為文操筆立成登紹興三十年進士  
第改秩知華亭縣邑版賦窄率貸諸豪民縣  
是撓政前令少善去侯謁臺府願寬假三月

乃治酒政損關征不三月課入自倍逋賦以  
償平易近民而決事若神豪猾斂手並海有  
秦山鹽鐵蚌港三堰不治被 旨督作蚤夜  
露處護田六萬畝守以圖奏

孝宗大悅亟加褒賞俸紹興府帥王希呂使  
者朱熹雅敬之委以諸旣具蕭山荒政活民十  
萬知興國軍陞辭乞免蕭山廢田之稅以時  
省繕華亭海堰禁邏兵胥吏擾汧海民船事  
皆施行改知岳州東官引見守臣論常平乏  
儲欲賣官田爲糴本及官陵祭禮等事

光宗見其儀矩雍容音吐明暢注目首肯悉  
爲奏可至郡覈四邑常賦外免其板帳鑿空  
者如馬草錢之類其目九八歲減一萬一千  
有奇奏定爲令除廣東倉時四明大饑詔  
移粟五萬斛浮海賑之鄉邦賴以濟南海驛  
道至真陽達凌江多窮荒複嶺乃改闢大道  
八百里置六鋪築七庵募人居之無復蛇虎  
暴客之害命南雄梅循等州作叢家瘞暴骨  
封州寇餘郡計不立請廢爲縣乃減其漕計  
蠲其宿逋代其助賞銀數請著於令州遂不

廢兼漕大奚山寇甚張帥司摧鋒軍與賊通  
奏豫發福州水軍爲之防 詔從之卒賴其  
用遷福建憲莆田兩囚共毆一人死爭下手  
重輕經七推歷數年未決被 旨往鞠之以  
爲兩人本謀共毆非謀共殺夜黑安能自知  
下手先後而孰能辨之奏俱免死除直祕閣  
召除尚書吏部郎中卒所至有遺愛民比曰立  
生祠事之聞訃相與聚泣或作佛事以報爲  
人風格清整篤於孝友居官爲人所難忠實  
若與神契董作華亭水不可食禱於簪井而



泉溢賑荒謁曹娥祠衆舟膠而已獨濟懷安  
虎暴禱南臺神一夕去衆皆異之自號益齋

趙夢遠  
爲墓誌

陳攄字君益鄞人 紹聖間宰南劍之將樂躬

崇學校獎進士類政尚愷悌先是邑民家舉  
一子富室不過二子餘悉棄之攄至諭以天  
性申以令申犯者窮治自茲民無不舉子矣  
男陳其名女陳其氏者皆然也後卒於官邑  
人思慕祠而祀之遇旱禱雨輒應以至鄰境  
淫雨亢陽乞靈祠下咸遂所祈部使者以其

有功於民乃請於

朝錫旌福廟額

見舊志

徐立之字植夫登州人年二十五登 紹聖初  
元進士甲科 靖康之變以百司扈

駕南幸丞相呂頤浩最知遇之及秦檜當國  
丐祠居鄞徜徉里閭三十年積官至朝議大  
夫年踰八秩手不釋卷卒累贈開府儀同三  
司子子寅字協恭以任補官中法科爲福建  
路檢法審覆囚牘累百駁正死罪七十九人  
歷大理官 乾道四年除知無爲軍 陞辭

奏兩淮地有餘而人不足臣嘗因勸勘歸正人公事以情問之皆以爲飢寒所迫不得已而爲此若得官備耕具使治淮上荒田以餬其口何苦犯法淮上牛亦艱得乞招歸正人營田免其牛稅彼必欣然從事畎畝農隙闕以武事備邊之至計也

孝宗大悅差往淮南楚州相視措置明年歸奏除大理正命知揚州莫濛協力施行屯田事措置淮東山水寨及民兵總首子寅往來相視六年正月自兼權駕部郎爲真四月差

知高郵軍兼領揚楚高郵盱眙四郡措置官  
田俄改知泰州七年四月除提舉淮東茶鹽  
常平措置官田如故 淳熙元年召除工部  
郎依舊措置官莊再遷大理少卿三年六月  
論罷起爲淮南運判運副歷揚州楚州修築  
高郵興化寶應縣石閘斗門函管隄岸護民  
田三千七百餘頃 紹熙三年知台州革秋  
苗僞鈔去軍士虛籍權酷征稅大率從寬而  
版曹比較 上供以台爲優寧海邑庠久廢  
買田五百畝以振之蠲民戶積逋十餘萬五

年除廣東提刑次年卒官

王次翁字慶曾其先濟南人 景祐五年

仁廟臨軒策士其祖异中首選已而視程文  
有摩改處特降第五名次翁克世其業齊魯  
之士多從之號兩河先生 崇寧二年以易

魁禮部別院辟龐初建又以詩書易三經就  
試俱第一除辟龐正時梁師成用事薦士多  
至華要號隱相一日命與次翁友者潛携文  
卷以去既而來謂子文達 天聽矣將處以  
臺閣次翁笑語之曰文間適中其諱幸取易

之友亟取以授併與友絕師成銜之出知道  
州徙容州政事一以陽城元結爲法作漫軒  
思元堂而甘棠之愛在焉 紹興初自廣西

運判召對論定規模圖中興等事忤時議丐  
祠寓金華六年呂頤浩帥長沙辟參謀遽乞  
休致貧特甚潘良貴訪之聞敗幃之下運籌  
聲視之乃推元元數耳尚書呂祉薦于朝七  
年有 旨落致仕八年 召爲郎中累遷中  
書舍人劉光世除使相欲任子文秩次公劾執  
奏繳還之 上曰王次翁詞婉而理直論事

者不當爾耶從橐闕負三省以王鉢林待聘  
及次翁名進 上曰王次翁文章似王安石  
德行似司馬光遂除工侍四蜀闕帥宰執以  
次翁張燾擬奏 上曰王次翁經術人也不  
可遠去朝廷於是燾帥成都而中外知次翁  
將大用矣十年除御史中丞首言和戰本一  
事 靖康以來領兵之將方動而排之使收  
議和之使欲行而阻之復止一進一却致此  
艱難權今之宜雖以和爲名而實不可忘戰  
備 上嘉納之 朝廷差李泗爲江內巡檢

宣撫司不受乃以所親丁俊爲之次翁言一  
巡檢不足論然法令沮于下而不知朝廷之  
尊浸不可長遂覈正之 上曰天下之事當  
謹其小小之不圖積習浸久將有大於此者  
王次翁所論深明國體即頒示諸將都統制  
呼延通因內教出不遜語次翁乞斬通以肅  
軍列一時驕將聞之震龍言 上勞之曰卿有  
李勉之風矣七月拜參知政事十二年扈從  
太母回鑿虜使邀金無厭次翁顯絕之而密  
令提舉事務者隨宜以給虜憚其剛嚴人謂



知體

上議遣使

報謝次公勿請行明年竣事

力丐退政除資政殿學士提舉洞霄宮來居  
鄞之西湖盜嘗罄其室或請白有司笑止之  
曰凍餒使然耳何尤 上聞之賜銀絹各千

十四年致仕十九年薨被 旨護葬清涼山

孝廟即位

詔贈太師有兩河集易說春秋

旨義元元通數等書藏于家三子伯庠

紹興二年進士試教官中第一爲 淳熙侍

御史有直聲伯序 紹興五年進士第五人

仕宗正丞伯癡以朝議大夫致仕

陸寘字元法其先會稽人曾祖軫尚書左丞佃  
之子也 慶曆中知明州叔傳 建中靖國  
及 大觀中兩知明州從兄長民 宣和中  
知明州寘嘗爲明州錄事 崇寧中奉行安  
濟居養漏澤有勞秩滿就除通判其後爲淮  
南江浙荆湖發運判官 建炎間卜居鄞之  
梅谿奉祠垂三十年工詩喜篆隸手抄經史  
洎釋老書親加籤校數百卷子孫甚蕃內任  
丞郎外任守倅遂著籍爲鄞人

陳之翰處士鄞人陳忠肅公瓘誌其墓云字憲

之居西湖少有志操治經求大旨爲文不蹈襲時語三上禮部不中因不復應舉歸求其志 大觀二年

徽宗皇帝詔舉逸遺鄞之賢士大夫聞而相與語曰此可以得憲之矣州及部使者用衆論薦于朝

天子官之知公行實而善 朝廷之得士者非特鄞之賢士大夫而已

林暉字公著鄞人嘗任迪功郎韶州司戶曹事恂恂孝謹輕財樂施 大觀間忠肅公陳瓘

寓居于鄞曄獨厚之雖其徙謫他所問遺常  
不絕建炎四年州燬于兵曄未暇葺舍宇  
首捐錢數十萬理學宮且輟田半頃爲養士  
費太守以風郡人黌宇始漸仍舊貫

王庭秀字穎彥先世居鄞父徙慈溪庭秀與黃  
庭堅楊時之徒游從其爲學旁搜遠紹不苟  
趣時好造詣深遠操植堅正發於文辭深茂  
宏達以其緒餘從事科舉政和二年登上  
舍第旣改秩以侍御史李光薦爲御史臺檢  
法官在宣和靖熾建炎間進言于朝皆

發於忠義自察院遷殿中臺綱益振出知筠  
州 召為吏部外郎擢左司郎官遷檢正與  
宰相議多齟齬以直祕閣奉祠而歸長子璧  
生而穎異不凡七歲日誦千言一過輒不忘  
以 宣和六年丙科登第少年氣銳負才宏  
碩方勇赴功名之會悉焚前所為舉子文披  
閱羣籍無不淹該適 朝廷方復博學宏詞  
科首冠其選天不假年終於一待次通判士

論惜之

見舊志

汪思溫字汝直鄞人父洙以春秋之學知名

政和二年思溫由太學上舍中乙科既改秩知餘姚縣

高宗登極提舉江西茶鹽歷郎曹出知衢湖二州入爲太府少卿知臨安府遷兩浙計度轉運副使復還太府 紹興二十七年致仕積官至左朝議大夫爵文安縣開國男餘姚瀕海有堤久而圯思溫修復之並海田免水患者六十里燭溪湖二斗門高下不等東西爭利思溫相地宜徹而平之灌溉均五鄉錢唐渡舟人冒利捆載而行半渡弭楫邀利暴

風猝至舉舟盡溺操舟者獨無恙思溫曰若不戮此輩殺人未艾也悉捕繫論殺之更造大艦十數每一艦受若干人製號如其數以五采別異之置吏監渡給號登舟即過數而號與舟不類皆不受人給直有定例除十之一以備繕舟自是人有病涉疏龍山河復舊閘啓閉出納如外沙之制舟楫皆便之鄉有義莊以給仕族親喪之不能舉孤女之不能嫁者自思溫割田倡之也年八十一終子大猷字仲嘉既補官復中 紹興十五年進士

乙科 乾道元年以大宗正丞兼吏部尚書  
郎又兼戶部右曹輪對

孝宗謂輔臣曰疏通詳雅有議論今日有用  
之材也權刑部侍郎取 建炎以後續降指  
揮二萬餘條刪其繁重定其當否編為條冊  
上嘉賞之同列以彊盜率不處死無所懲艾  
請依

太祖舊法賊滿三貫者皆斬大猷曰

太上與民更始非以刃殺人者一切貸死已  
議為法六項犯者依死處斷非此而但得財



惟再犯者死可謂寬嚴得中矣此輩知有可  
生之路但志得財所全尚多若不分首從雖  
不殺傷悉皆抵死則凡得財鮮不及三貫者  
此法既立未必能禁其為盜彼先以死自處  
則被盜者將無噍類為盜者無復全人究其  
極而計之死者益衆矣同列請取案例大猷  
以見定一案聞奏用六項法則死者十七人  
用見行法則纔四人若如舊法則百七人俱  
死遂從其議借吏部尚書為六年賀金國正  
旦國信使 郊禮行充鹵簿使除敷文閣待

制奉祠起知泉州進直學士知隆興府茶寇  
賴文正起湖北大猷遣副總管賈和仲討之  
和仲輕敵敗事大猷自劾再命落職南康軍  
居住至四年自便漸復職 紹熙二年致仕  
慶元五年進敷文閣學士六年薨年八十一  
方貶謫時或風使通權貴書不聽南康之行  
親故恐其嬰抱大猷揖之曰使某年近六十  
以恩科得官今赴星子一尉豈不爲我賀其  
曠達類此三子仲曰立中登 嘉定甲戌科  
爲太府少卿知徽州卒

林保字庇民，鄞人。登政和二年上舍第。兩從廣西帥辟，主管機宜文字。時方郡縣蠻境，將士率俘平民，冒賞保覈正之。全活爲多，歷官知興國軍，改提舉兩浙廣南市舶，皆不拜。家居十餘年，安貧著書，嘗評論夏少康迄唐肅宗得失，號中興龜鑑。上之。

高宗皇帝勅書褒答。紹興七年，上命左司諫陳公輔薦可備臺諫者。公輔奏保問學淵源，持論不阿。操守可觀，丞相秦檜隔之。止除提舉江東常平茶鹽。九年，入爲國子監丞。

遷比部郎建議正大成殿武成殿十位侑坐  
之禮自是享武成王始不廢牲牢脩定明州  
鄉飲酒禮奏聞頒行天下累遷權吏部侍郎  
假本曹尚書充十五年賀金國正旦使初  
顯仁皇太后南歸公塗應奉權增頓次自後  
南北修聘往來輒循其例又有請起兩淮稅  
者保使回具言淮民凋敝狀頓既復舊稅議  
亦格冬引疾以敷文閣待制奉祠十九年卒  
年七十一累贈特進有文集三十卷孫祖洽  
字元禮以任補官由鹽官縣入爲幹辦諸軍

審計司每言理財在節用正其圖籍窒其滲  
漏不必趣迫其民財用自足嘗取 紹興乾  
道淳熙用度多寡之數比擬參定四方無虞  
之時反增於戎馬未息之日條具為書未及  
上因知武岡軍陸辭奏曰當今百度修明惟  
財賦不足上軫宵旰之憂推原其故皆由用  
度日增

孝宗慨然曰誠如卿言詔取索以聞戶部  
不行時論惜之自武岡除常州

上謂宰執曰此人善治財賦任滿進財賦本

末

上曰人皆謂常州財賦不足今林祖洽已及八分以上遂除司農丞其後提點六路坑冶總領湖廣江西京西財賦除湖南運判入爲中書門下省檢正諸房公事兼國用司同參計官陞司農卿總領淮東財賦自太平州除權戶部侍郎嘉定二年再爲淮東總領四年正月除戶部侍郎歷知建康府婺州皆振其職六年以煥章閣待制奉祠十一年陞寶文閣致仕卒年七十九

朱翌字新仲 政和八年賜同上舍出身歷官  
至中書舍人 南渡以來建太學載韓厥於  
祀典皆翌發之

徽宗皇帝實錄翌所纂也在 朝敢言事嘗  
奏論信夷狄太堅待虜使太厚排衆論太切  
姑息諸將太深待大臣太嚴立志太弱忤權  
臣意一斥十四年起知嚴州寧國平江府擢  
節浮費積緡錢四十萬於平江

高宗皇帝視師江上後守獻之有 詔嘉獎  
自祠宮起知太平潭泉三州皆不赴年七十

乾道三年卒累贈少師翌世家安慶府懷寧  
縣晚卜居于鄆有瀟山文集四十卷

薛朋龜字彥益登 政和八年進士第歷官監

登聞檢院兼權工部郎又兼權吏部知興國

軍奉祠除知衡州未上而卒子居實字去華

守莆陽更新學士官提舉福建路常平茶鹽救

荒有績自祠官 召對除倉部外郎陞郎中

歷淮西漕使淮東帥闕卒于揚州子揚祖字

元振歷官知漳州 召為大理丞遷刑部郎

中以疾請外得池州丐祠以卒漳舊有土城



高不過五尺揚祖以修築請于朝未之行也及爲郎面對申言此州當閩廣往來之衝而城壁不立往時沈師竊發以無備故可爲覆車之戒乞以臣任內椿積錢趣辦

寧宗乃詔守臣趙汝諧經畫如其言漳人賴之

曹粹中字純老定海人中宣和六年進士丙科爲莊簡公李光壻光與聞紹興國論丞相秦檜欲一識粹中粹中時待次無爲校官曰吾已有差遣見丞相何爲退謂其妻曰吾

觀而父與秉權者勢不兩立豈久居此者由  
是仕不偶自號放齋以著書爲樂檜死方以  
舉主脫選調有詩說三十卷行于世

夏承字元茂鄞人以太學上舍免省中 崇寧

五年第 靖康間任開封少尹虜騎犯 闕

大尹徐秉哲散文牒根括 皇族冀以免死

承奮身力爭潛令諸廂毀棄文牒放散苛留

之人 紹興二年臣寮疏列其事 國事方

殷未及褒表 隆興初有 旨承係忠義之

人送史館編錄姓名特贈三官二年贈左朝

議大夫

蔣璿字季莊晚居慈溪 宣和間郵王氏之學  
耻赴科舉閉門窮經不事干謁亦不妄與人  
接高侍郎閑居鄞城一歲率數次訪其家相  
對小室晝夜講論告去則送之數里或問閑  
曰蔣君不多與人周旋而獨厚於公公亦倦  
倦於彼願聞其故閑曰某終歲讀書偶有疑  
而未判與闕而未知者每積至數十輒一扣  
之無不迎刃而解蔣之所長他人未必盡知  
也况有行義乎

卞大亨字嘉甫泰州人初由鄉舉入太學升舍

有聲靖康中携二子走行在丞相范宗

尹以遺逸薦紹興中隱居象山之錢唐

特恩調懷寧簿無仕進意手植萬松婆娑成

陰行吟其間自號松隱居士好左氏傳遷固

史耽老杜詩喜怒哀樂一寓於詩素習養生

導引術醫藥占筭尤極其妙解衣推食賑卹

飢寒手製藥餌惠利甚博著松隱集二十卷

尚書類數二十卷改注杜詩三十卷傳信方

一百卷子園字子車亦有聲太學號卞夫子

登 紹興三十年第授揚州倅卒

郡志卷第八